

華嚴經普賢行願品疏卷九

唐罽賓國三藏般若奉詔譯

澄觀述疏

◎大威猛聲仙人八住章

△第八大威猛聲仙人寄童真住。心不生倒，不起邪魔破菩提心，故名童真。文亦具六。

爾時善財童子隨順思惟菩薩正教。隨順思惟菩薩淨行。

第一依教趣求。於中亦二。先念前友教。

起速疾增長一切菩薩福力心。起速疾普見一切諸佛光明心。起速疾獲得一切法藏心。起速疾增長一切大願心。起速疾現見十方諸法心。起速疾明照諸法本性心。起速疾散滅一切障礙心。起速疾觀察法界無闇心。起速疾能壞內垢金剛心。起速疾摧伏魔王軍眾心。起速疾清淨意寶莊嚴心。

有十三句。前二句總順解行。後十一句增進勝心。

如是思惟。漸漸遊行至那羅素國。周徧尋求大威猛仙。

後如是思惟下，趣求後友。

見一大林。其林蓊鬱。阿僧祇樹以為莊嚴。所謂種種葉樹，枝條扶疏，密葉蔥翠。種種華樹，柯葉布濩，繁華鮮美。種種果樹，相續成熟。種種寶樹，雨摩尼果。大梅檀樹，處處行列。諸沈水樹，常出好香。閻浮檀樹，恆雨甘果。悅意香樹，妙香莊嚴。波吒羅樹，其華鮮榮，香氣芬馥，四面圍繞。尼拘陀樹，其身聳擢，枝葉繁布，盤旋如蓋。優鉢羅華，波頭摩華，拘物頭華，芬陀利華，處處開敷，以嚴池沼。

第二見一大林下，見敬諮問。於中三。初見。次敬。後諮問。初中分二。先見依。後見正。今初。波吒羅樹者，同此方楸樹。尼拘律者，如此方柳樹，子似枇杷。餘可知。

時善財童子入此大林。見栴檀樹，其身洪直，枝條垂布，華葉繁密，偃蓋成蔭。時彼仙人在此樹下，縈髮為髻，藉以香草。十千仙眾，前後圍繞。其諸仙人，或衣鹿皮，或衣樹皮，或編細草，種種衣服，髻環垂鬢，瞻仰而住。

後時善財童子入此下，明見正報。領徒十千，表萬行故。

善財見已，往詣其所。五體投地，深心頂禮，作如是言，我今得遇真善知識。

第二善財見已下，設敬稱讚。於中三。初總明三業敬讚。

復作是念，善知識者則是趣向一切智門，令我得入真實道故。善知識者則是趣向一切智乘，令我得至如來地

故。善知識者則是趣向一切智船，令我得至智寶洲故。善知識者則是趣向一切智炬，令我得生十力光故。善知識者則是趣向一切智道，令我速入涅槃城故。善知識者則是趣向一切智燈，令我得辨邪正路故。善知識者則是趣向一切智橋，令我得度生死流故。善知識者則是趣向一切智蓋，令我獲得慈悲蔭故。善知識者則是趣向一切智津，令我速達功德岸故。善知識者則是趣向一切智眼，令我得見法性門故。善知識者則是趣向一切智潮，令我應限不失時故。

次復作是念下，意業慇重。

作是語已，從地而起，繞無量匝，合掌前立。

後作是語已下，身業虔恭。

白言，聖者，我已先發阿耨多羅三藐三菩提心，而未知菩薩云何學菩薩行，云何修菩薩道。我聞聖者善能誘誨，願為我說。

第三白言聖者下，諮問法要。

△第三時彼仙人下，稱讚授法。於中分二。第一稱讚法

器。第二正授法要。

時彼仙人顧盼仙眾而告之言，諸仁當知，此童子已發阿耨多羅三藐三菩提心。

此童子欲施一切眾生無畏。此童子欲與一切眾生利益。
此童子欲惠一切眾生安樂。此童子欲觀一切諸佛智海。
此童子欲蔭一切如來法雲。此童子欲遊一切諸佛教海。
此童子欲然一切大智明燈。此童子欲起一切大慈悲雲。
此童子欲飲一切甘露法水。此童子欲雨一切廣大法雨。
此童子欲以智月普照世間。此童子欲滅眾生煩惱毒熱。
此童子欲施世間善法清涼。此童子欲長含識一切善根。

前中三。初主讚。示其徒者令敬學故。

時諸仙眾聞是語已，各以種種上妙香華散善財上，布身作禮，繞無量匝。稱揚讚歎，作如是言，今此童子，必能救護一切眾生。必能除滅諸地獄苦。必能永斷諸畜生趣。必能永離閻羅王界。必能關閉諸難處門。必能乾竭諸愛欲海。必能解脫貪欲纏縛。必能永滅眾生苦蘊。必能永破無明黑暗。必以福德大輪圍山周護世間令其安樂。必以智慧大寶須彌顯示世間功德智聚。必以清淨無礙智日開示一切善根法藏。必令眾生開淨智眼明識世間歸於正道。

次時諸仙眾下，眷屬讚。由上指示故。

時大威猛聲告群仙言，善男子，若有能發阿耨多羅三藐三菩提心，必能勇猛行菩薩行。必能饒益一切眾生。必與眾生廣大利樂。必能成就一切智道。此善男子已發阿耨多羅三藐三菩提心，當淨一切佛功德地。

後時大威猛下，述讚。

說是語已，告善財言，善男子，我得菩薩無勝幢解脫門。

第二說是語已下，正授法要。於中二。先示法名體。童真淨智，變化自在，故名無勝。高出功用，相惑不動，所以名幢。

善財白言，聖者，此解脫門，境界云何。

後善財白言下，問答境界。先問。

時彼大仙即伸右手摩善財頂，執善財手。

後答。答中二。一加令證見，即示相答。二攝用言示，即言說答。前中亦二。先加持。摩頂即是加持之相。執手表乃為授與之義。亦相攝有力，入法界故。

即時善財自見其身普往十方百千佛剎極微塵數諸世界中，普詣十方百千佛剎極微塵數諸如來所，見彼佛剎及其眾會種種莊嚴。亦見彼佛種種相好光明熾盛。亦聞彼佛隨諸眾生心之所樂而演說法。一文一句皆悉通達，各別領受。諸佛法輪各別記持。開發義理，前後次第，無有雜亂。亦知彼佛所度眾生種種樂欲，隨其根性，雨諸法雨，各得成熟。亦知彼佛於往昔時以種種解淨諸願

海。亦知彼佛以清淨願成就諸力。亦見彼佛隨眾生心所現種種差別色身。亦見彼佛大光明網種種色相圓滿清淨。亦知彼佛無障礙智道場眾會清淨莊嚴。又自見身普於一切諸如來所，親近供養，受持正法。或於佛所一日一夜，或於佛所七日七夜，或經半月，或經一月，一年十年，百年千年，或百千年，或經億年，百億千億百千億年，或阿庾多億年，或那由他億年，或經半劫，或經一劫百劫千劫，或百千億阿庾多那由他億劫，乃至不可說不可說佛剎極微塵數劫，如是一切咸悉了知，無不通達。

後即時善財下，得益。於中二。先明目睹身經。

爾時善財童子為菩薩無勝幢解脫智光明照故，得毗盧遮那藏三昧光明。為無盡智解脫三昧光明照故，得普攝諸方現諸方身陀羅尼光明。為金剛輪陀羅尼光明照故，得清淨境界智慧聚三昧光明。為普門際境界莊嚴藏般若波羅蜜光明照故，得佛圓滿虛空藏三昧光明。為一切佛戒定慧法輪三昧光明照故，得三世無盡圓滿智三昧光明。

後爾時善財童子為菩薩無勝下，內心證入。文有十句五對。謂得善友五法所照，自得五種三昧光明。其五能

照，初總，餘別。皆無勝幢差別妙用。一無勝幢光明照得毗盧遮那藏三昧光明者，此是總句。無勝幢者，真智起用。由為此照故得即寂智慧光明，遍照事理，見佛聞法皆此用故。別有四用。一境無不照。二照無不圓。三橫無不具。四豎無不攝。由此四義，成後四益。謂二既境無不照，稱無盡智。為此所照故，得總攝諸方總持。成前其身到十方剎。三由照無不圓為金剛輪。為此所照，則萬法本淨，為智慧聚。大般若云，般若波羅蜜多清淨故，一切清淨。成前受持佛法無亂。四由能照橫無不具，為普門際。普門即境。總具諸度以為莊嚴，故復

名藏。為此所照故，得如空包含佛德無礙圓滿。成前得佛諸願諸力。五由能照豎無不攝，故云一切佛戒定慧。三學圓滿，名之為輪。由得此照，豎窮三世，圓滿智輪。成前見佛色身光網及無礙智輪。此上三事即三輪也。陀羅尼約總持。三昧約寂定。唯第二所得闕三昧言，或恐脫略。

時彼仙人放善財手。善財童子即自見身還在本處。

二時彼仙人放下，攝用言示。於中二。先放捨加持。二問答承領。今初。所作訖故。還在本處者，上來加持，

不移本處而遍十方。故攝神力，本無來往。處既在本，時亦不長。斯即念劫圓融，遠近無礙。此皆善友法門之力。是以善財於一生中辦多劫事，豈以三劫而為定遠。

仙人告言，善男子，汝憶念耶。善財言，唯，此是聖者善知識力，令我憶念分明顯現。

二仙人告下，問答承領，可知。

仙人告言。善男子，我唯知此菩薩無勝幢解脫門。如諸菩薩摩訶薩成就一切殊勝三昧。於一切時而得自在。於

善男子，於此南方有一聚落，名伊沙那。彼有住處，名阿野怛那。有婆羅門，名曰勝熱。汝詣彼問，菩薩云何學菩薩行，修菩薩道。

第五善男子於此下，指示後友。聚落名伊沙那者，此云長直。謂長者，盡知三際。直者，善知勝義。住處名阿野怛那者，此方云熱住處。婆羅門名勝熱者，五熱炙身，勝彼熱故。具足梵音云惹耶，唐言勝。鄔澀摩，唐言火熱。表體煩惱熱成勝德故。不染煩惱成淨行故，云婆羅門。

時善財童子歡喜踊躍，生愛敬心。頂禮其足。繞無數
匝。殷勤瞻仰。辭退南行。

禮辭可知。

淨空法師專集網站(簡)製作